

Daxbuz Cangh Ranznden Gou

邻居张奶奶



Daxbuz Cangh dwg ranznden gou, dou guh ranznden miz haj bi seizgan lo. De dwg boux daxbuz simsienh youh haengj bang vunz ndeu.

Daxbuz Cangh byoem hauswd-swd, najbyak miz haujlai riznyaueuq, aennaj daxbuz Cangh moix ngoenz cungj riunyumnyum, gou roxnyinh de gig hozswnh.

Gou ciengzseiz dingq daxboh naeuz, youq gou seiz iq, bohmeb mbouj ndaej hoengq, daxbuz Cangh couh daeuj ciuqgoq gou, daiq gou bae guhcaemz. Miz baez ndeu, daxbuz Cangh daiq gou bae gunghyenz guhcaemz, gou mbaet duj va ndeu yo youq baihlaeng, heuh daxbuz laep aenda, gou laeglemx dawz dujva baek youq gwnz gyauej daxbuz, deq de baez hai da, gou youh yungh gij va gou mbaet haenx, guh lumj dahsien gwnzmbwn vanq va nei vanq roengz-daeuj. Daxbuz Cangh angq dwk fajnaj riunyumnyum.

Ceiq hawj gou hoj lumz dwg baez banringzgvaq ndeu, cuengqhag le, gyoengq doengzhag baema ranz caez

lo, caenh gag gou boux dog youq ndaw hagdangz, hagdangz caemrikrik, caenh ndaejnyi sing rumz cifofo, gou naemj: Bingzseiz daxboh gig noix daengz gvaiz, baenzlawz ngoenzneix daeuj ndaej baenz gvaiz ni? Sawqmwh, gou fatyienh boux vunzlauz ndeu, lumj-baenz dwg daxbuz Cangh, caj de byaij engq gyawj, baez yawj, caen dwg daxbuz Cangh dahraix, gou cam: “Daxbuz Cangh, mwngz baenzlawz daeuj lo?” Daxbuz Cangh itmienh uet hanh itmienh naeuz: “Daxmeh mwngz dwk dienhvah hawj gou, heuh gou daeuj cieq mwngz, daxboh daxmeh mwngz miz saeh okbae lo!”

Daj hagdangz daengz ndaw ranz ngamq miz dinjdetdet cib geij faen

cung, dou cix byaij baenz buenq diemj lai cung. Daengz ndaw ranz gou, daxbuz Cangh heuh gou sij cozyez, de swheij cawj haeux, daxbuz lij bang gou cawj gij dangbyaekheu gou haengj gwn haenx, gou gwn baenz sam vanj hung ne!

Doeklaeng, dou senj ranz lo, hoeng daxbuz Cangh doiq gou gij gvansim caeuj ciuqgoq haenx, gou lij ndaejgeiq youq ndaw uk, miz seiz guh fangzhwnzloq cungj loq raen de. Daxbuz Cangh nienzgeij yied ngoenz yied geq lo, gou muengh daxbuz Cangh ciengxlwenx ndangndaej cangqheiq.

(bouxij Huz Siujcingh boux-hoiz Goenggen)

Bae “Ranzfangz”

去“鬼屋”

Doengzhag ndaw ban daezok doxcaez bae “ranzfangz”. “Ranzfangz” dwg ranz gaeuq lauxsae, aenvih gij ranz neix gaeuq lai, gig noix miz vunz youq. Gou lau doengzhag riu gou mbeiiq, cijnde cengqgengz riengz gyoengqde bae yawj-yawj.

Dou youq naj “ranzfangz” gangjvah cijcij cetcet haemq nanz, cij miz boux doengzhag mbeihung ndeu byaij hwnjbae. De byaij ndaej gig vaiq, song sam mbat couh mbouj raen ngaueuz de youq baklae lo. Raen miz boux vunz he hwnjbae le, gyoengqvunz lumj mbouj lau dai nei, caenx hwnjbae lo.

Gou ndawsim gig luenh, dauqdaej hwnj mbouj hwnjbae ne? Gou nyaueuq dwk bwnda, siusim dwk yamq bae coh aenlae yamq he. Sawqmwh, din gou lumj deng feiz ndat nei, youh sou din dauqma. Gou youh gag gujli swheij, laep da hwnj, vaiqviet dwk byaij hwnj lae bae geij yamq, raen mbouj miz iucing fangzyak, seiq-henz lij dwg yienghhaenx caemdingh.



Yienghneix gou youh cengqgengz yamq bae geij yamq. Seiqlenz caemrwgrwg, caem dwk gou dingq ndaejnyi sim gou diuqbubbub. Moix yamq yamq he cung dwg gig coegcamz, genhciz byaij le haujlai yamq, gou dauqdaej byaij hwnj ngeih laeuz lo. Gou byaengq lwgda, yawj aen “ranzfangz”, raen aenranz neix cij mbouj-gvaq dwg aen ranz gaeuq he. Gou mbeihung buet hwnj caengz laeuz ceiqsang aen “ranzfangz” neix bae.

Gou lumj roxdaengz lo: Gij lae aen laeuz neix couh lumj mbaeklae ciuhvunz, moix mbeihung yamq hwnj bae mbaek ndeu, couh liz cwnzgunggh gyawj di ndeu.

(sam nienzgaep Cuh Yizvej)

Genhciz Lienh Giuz

坚持练球

Mwh it nienzgaep, gou hainduj hag dik cuzgiuz, nauh ok haujlai vahriu.

Miz baez ndeu lienh giuz, giuzyenz doih gou cienz giuz hawj gou, aengiuz mbin coh aendungx gou, gou deng hwk dwk cienq ndang couh buet. Hoeng giuz mbin ndaej beij gou buet vaiq, mbat saemxsax, gou deng laemx boemzhoemj lo. Gyoengqdoih youq henz riu dwk bouxboux got aendungx.

Lij miz baez ndeu, gyaulen heuh dou lienh gyauej dingj giuz. Ngamq hainduj, gou mbouj rox baenzlawz lienh, couh dawz aengiuz vut hwnj daegbied sang, yienzhaueh ngiengx aen-gyauej daeuj dingj, doeklaeng, aengiuz gig rengz doek daengz gwnz naj gou. Gyoengqdoih riu dwk ga unq bae.



Gou cix mbouj aenvih yienghneix deng hwk le mbouj lienh giuz, gou moix ngoenz genhciz lienh giuz, gisuz dik giuz dingj giuz gou ngoenz beij ngoenz ndei. Seizneix gou gaenq mbouj caiq nauh ok gij yiengh hawj vunz riuz haenx lo.

(ngeih nienzgaep Swng Cicwnz)

Ndang goeng gou mbouj sang, de enj dwk aendungx hung ndeu, lumj youq najaek umj dwk aen sihgvah nei.

Gou gig baiqfug goeng gou, aenvih de dang bing gvaq, caemhcaiq lij dwg boux dangjyenz geq ndeu ne. Moix baez bungz daengz cuengqgyaj, gou couh nem dwk daxgoeng heuh de gangj gij saeh yinx mwh gyoengqde dangbing haenx, lij miz guekcoj hungmbwk raeuz fatseng le gijmaz bienqvaq lai. Goeng ne, couh umj dwk gou gangj mbouj dingz, dou gig doxcaen ha.

Daxgoeng dwg boux “roenroen doeng” ndeu—de sugrox gij roen doeng bae seiqmienh betbaih haenx, caemhcaiq ndaej gig cinj cei ok, yienzhaueh genjdanh cingcuj gangj hawj vunz diegrog nyi, de caen yiedcingz, miz sim ha. Vunz diegrog

Daxgoeng Caen Ndei

爷爷真好

dingq le sikhaek couh roxdingh lo, youq henz deihdeih ngaek gyauej. Moix baez de cei roen hawj vunz seiz, gou youq henz ndang de hix roxnyinh miznaj lai, nyaenx mbouj ndaej youq ndawsim haenx de, doengzseiz gou hix daj ndawde hag ndaej haujlai dilij cihsiz.

Goeng gou lij gyaenz yawj bauq-ceij dangqmaz, daj ndaw bauqceij “daezlien” ok gij neiyungz ndei daeuj. Mwh gou banringzgvaq ma ranz baez haeuq dou, de couh hainduj dawz gijneix lwnh gou nyi, doengxhaemh gwn caeuz seiz de youh caeuz daxmeh

lwnh ndaej haenqremrem.

Goeng gou lij gyaenz bae youz. De moix baez cungj maij riengz gyoengqvunz seiqlengq bae youz, gou swhyienz hix miz faenh, ciengzseiz ndaej riengz de bae. Youq geij bi neix gou ndaej bae le haujlai deihfueng, hix hag ndaej haujlai cihsiz, caen maqmuengh gij gihvei neix caiq miz lai di.

Goeng gou lij rox dajcawj, de cawj gij byaek homvan habbak, bouxboux cungj gyaenz gwn; goeng lij rox guhsaeg, de saeg gij buhvag seuqseuq saksak, saeg ndaej le lij daeb ndaej cingjingj caezcaez; goeng

lij rox guh hongranz dem, gij deihbanj da gvaq haenx cat dwk rongh ndaej ciuq raen ngaueuz bae……Gou vih miz boux goeng “yienghyienh rox” ndeu gamjdaengz najrongh.

Muengh daxgoeng mizfuk lumj Doenghaij, naihsouh gvaq Byacungh-nanzsan, najhai ciengz miz, yienghyienh cungj ndei!

(bouxij Fouzmingz bouxhoiz Ouh Caijfangh)

